

01

《七月七日侍皇太子宴玄圃园》

潘尼

商风初授，辰火微流。
朱明送夏，少昊迎秋。
嘉禾茂园，方草被畴。
于时我后，以豫以游。

02

《七月七日夜咏牛女诗》

谢惠连

落日隐櫺楹，升月照帘栊。
团团满叶露，析析振条风。
蹀足循广除，瞬目矚曾穹。
云汉有灵匹，弥年阙相从。
遐川阻昵爱，修渚旷清容。
弄杼不成藻，耸辔骛前踪。
昔离秋已两，今聚夕无双。

倾河易回斡，款情难久惊。
沃若灵驾旋，寂寥云幄空。
留情顾华寝，遥心逐奔龙。
沈吟为尔感，情深意弥重。

03

《七夕月下诗》

王僧达

远山敛氛寝，广庭扬月波。
气往风集隙，秋还露泫柯。
节期既已孱，中宵振绮罗。
来欢讵终夕，收泪泣分河。

04

《七夕诗》

萧衍

白露月下圆（团），秋风枝上鲜。
瑶台含碧雾，罗幕生紫烟。
妙会非绮节，佳期乃凉年。
玉壶承夜急，兰膏依晓煎。
昔悲汉难越，今伤河易旋。
怨咽双断念，凄悼两情悬。

05

《为织女赠牵牛诗》

颜延之

婺女俪经星，姮娥栖飞月。
惭无二媛灵，托身侍天阙。
阊阖殊未晖，咸池岂沐发。
汉阴不夕张，长河为谁越。
虽有促燕期，方须凉风发。
虚计双曜周，空迟三星没。
非怨杼轴劳，但念芳菲歇。

06

《七夕穿针诗》

柳恽

代马秋不归，缁紈无复绪。
迎寒理衣缝，映月抽纤缕。
的皪愁睇光，连娟思眉聚。
清露下罗衣，秋风吹玉柱。
流阴稍已多，馀光欲谁与。

07

《七夕》

邢子才

盈盈河水侧，朝朝长叹息。
不吝渐衰苦，波流讵可测。
秋期忽云至，停梭理容色。
束衿未解带，回銮已沾轼。
不见眼中人，谁堪机上织。
愿逐青鸟去，暂因希羽翼。

08

《池塘七夕》

温庭筠

月出西南露气秋，绮罗河汉在斜沟。
杨家绣作鸳鸯幔，张氏金为翡翠钩。
香烛有花妨宿燕，画屏无睡待牵牛。
万家砧杵三篙水，一夕横塘似旧游。

09

《行香子·七》

李清照

草际鸣蛩，惊落梧桐，正人间、天上愁浓。

云阶月地，关锁千重。
纵浮槎来，浮槎去，不相逢。

星桥鹊驾，经年才见，想离情、别恨难穷。
牵牛织女，莫是离中。
甚霎儿晴，霎儿雨，霎儿风。

10

《荔枝香近·七夕》

吴文英

睡轻时间闻，晚鹊噪庭树。
又说今夕天津，西畔重欢遇。
蛛丝暗锁红楼，燕子穿帘处。
天上、未比人间更情苦。

秋鬓改，妒月姊、长眉妩。
过雨西风，数叶井梧愁舞。
梦入蓝桥，几点疏星映朱户。
泪湿沙边凝伫。

11

《夺锦标·七夕》

张埜

凉月横舟，银横浸练，万里秋容如拭。
冉冉鸾骖鹤驭，桥倚高寒，鹊飞空碧。
问欢情几许，早收拾、新愁重织。
怅人间、会少离多，万古千秋今夕。

谁念文园病客。

夜色沉沉，独抱一天岑寂。
忍记穿针亭榭，金鸭香寒，玉徽尘积。
凭新凉半枕，又依稀、行云消息。
听窗前、泪雨潇潇，梦里檐声犹滴。